



Komunikadu Imprensa

Periodu : Jullu 2011

Edisaun : 05 Jullu 2011

JSMP participa iha painel ba konferensia hato'ó peskiza foun konabá Timór

Iha loron 30 fulan Juñu no loron 1 fulan Jullu tinan 2011, Programa Monitorizasaun do Sistema Judicial, hola parte iha painel hodi halo apresentasaun konabá Lei Kontra Violénsia Doméstika iha konferensia Internacional ho tema “Hato'ó Peskiza Foun ba Timór Léste”, ne'ebé mak hala'o iha Sentru Formasaun João Paulo II, Comoro Timór Léste.

Materia apresentasaun ne'ebé JSMP hato'ó iha konferensia ne'e ho topiku “ Lei Kontra Violénsia Doméstika *“Intende Kuadru Legál Foun”*, *“Rezultadu Treinamentu Legál ba Profissional Saúde no Advogadu”* nomós materia konabá *“Dezafiu ba implementasaun Lei Kontra Violénsia Doméstika.”*.

Konferensia internasionál ne'e organiza no realiza ho kolaborasaun entre Universidade Nasionál Timór Léste, *Swinburne University Of Technology*, no *the Technical University of Lisbon*. Konferensia ne'e nu'udar koferensia ho natureza akademiku ba dala tolu ne'ebé halo iha Timór Léste. Panelista sira iha konferensia ne'e mai husi peskizador ho disiplina akademiku oin-oin husi rai ka universidade oi-oin ne'ebé antes ne'e involve ona peskiza iha área diferente iha Timór Léste.

JSMP sente haksolok bele participa no tuur hanesan panilista iha eventu ne'e tanbá bele fahe JSMP nia servisu iha área prevensaun violénsia doméstika ba participante sira. Prezensa JSMP nian sai interesante liu tanbá involve representante nain 5 husi JSMP. Sira nain lima ne'e mak Amrita Kapuur nu'udar Asesor ba Unidade WJU, Suzanne Belton Menzies nu'udar konsultan ba projeitu treinamentu ba profisionál saude no advogadu sira iha projeitu (AusAid nian, Venancio da Costa, peskizador juridiku iha WJU, Fransisca da Silva, staff relasaun públiku, no Marcelina Amaral, husi VSS.

Diretór JSMP, Luis de Oliveira Sampaio *haktuir involvimentu JSMP nian iha eventu ne'e nu'udar oportunidade ida ne'ebé importante tebes atu fahe no divulga aktividade JSMP nian ba comunidade akademiku no participante sira ne'ebé mai husi disiplina no área diferente, liu-liu atu oinsa mak sira bele hatene klean konabá enkuadramentu juridiku Timór Léste nian relaciona ho violénsia bázeia ba jéneru no dezafiu sira iha nivel prátiku.*

Iha konferensia ne'e JSMP apresenta konabá "Lei Kontra Violénsia Doméstika *"Intende Kuadru Legál Foun"*, "Rezultadu *Treinamentu Legál ba Professional Saúde no Advogadu*" nomós materia konabá *"Dezafiu ba implementasaun Lei Kontra Violénsia Doméstika."*

Bázeia ba JSMP nia observasaun iha konferensia ne'e, hatudu katak ema barak mak antusiasmu tebes hakarak participa iha sesaun ne'ebé mak apresenta husi JSMP, tantu iha parte Ingles no mós Tetum. JSMP bele fahe esperensia konabá aktividade ne'ebé mak durante ne'e JSMP halo.

Projeitu ne'e halo parte husi projeitu koperasaun JSMP ho AusAID ba programa treinamentu ba profesional saúde no advogadu privadu sira. JSMP hein katak ho esforsu no involvimentu JSMP nian iha eventu hirak ne'e bele kontribui diak liu atu halo diferente kontribuisaun JSMP ba prosesu prevensaun no eliminasaun violénsia hasoru fetu iha Timór Lésté.

Atu hetan informasaun kle'an, favor kontaktu:

Luis de Oliveira Sampaio

Direitór Ezekutivu JSMP

Diresaun Email: luis@jsmp.minihub.org

Landline: 3323883